

Lescha davart l'assicuranza da malsauns e la reducziun da las premias (LARP)

Midada dals [Data]

Relaschs tangads da questa fatschenta (numers dal DG)

Nov:	–
Midà:	542.100
Aboli:	–

Il Cussegl grond dal chantun Grischun,

sa basond sin l'art. 31 al. 1 da la Constituziun chantunala,
sunter avair gi' invista da la missiva da la Regenza dals ...,

concluda:

I.

Il relasch "Lescha davart l'assicuranza da malsauns e la reducziun da las premias (LARP)" DG [542.100](#) (versiun dals 01-01-2014) vegn midà sco suonda:

Titel suenter Art. 19b (nov)

3a. Admissiun a l'actividad a quint da l'assicuranza obligatorica per la tgira da malsauns

Art. 19c (nov)

Concessiun da l'admissiun

¹ L'admissiun a l'actividad a quint da l'assicuranza obligatorica per la tgira da malsauns tenor l'artitgel 36 LAMal¹⁾ vegn concedida da l'uffizi cumpetent.

¹⁾ CS [832.10](#)

² L'admissiun scada:

- a) sche sia titulara u ses titular na fa betg diever da quella entaifer 6 mais suenter ch'ella è vegnida concedida, nun ch'il termin na possa betg vegnir observà per motivs giustifitgads sco malsogna, accident u furnaziun supplementara. L'admissiun scada independentamain da l'existenza da motivs giustifitgads, sche sia titulara u ses titular na fa betg diever da quella entaifer 12 mais suenter ch'ella è vegnida concedida;
- b) cun declerar en scrit la renunzia a l'admissiun;
- c) cun renunziar a la pratica da la professiun u cun terminar il manaschi en il chantun Grischun;
- d) cun la cumplenida dal 70. onn da vegliadetgna, nun che la media uffiziala u il medi uffizial cumprovia ch'i na dettia nagins motivs fisics u psichics per betg pratigar la professiun. La cumprova sto vegnir furnida mintga 2 onns.

Art. 19d (nov)

Surveglianza

¹ L'uffizi exequescha la surveglianza tenor l'artitgel 38 LAMal.

² Per las controllas ordinarias vegn fatg giu in termin. Per las controllas sto vegnir concedi l'access a las localitads, a las installaziuns ed a las registraziuns e ston vegnir dadas las infurmaziuns necessarias a l'uffizi u a las terzas personas ch'èn incumbensadas dad el.

³ En cas d'in suspect che las premissas d'admissiun na vegnian posteriuramain betg ademplidas u che l'admissiun saja scadida, sto la persuna pertutgada respectivamain l'organisaziun pertutgada conceder da tut temp e senza annunzia l'access a las localitads, a las installaziuns ed a las registraziuns a l'uffizi u a las terzas personas ch'èn incumbensadas dad el.

⁴ L'uffizi po sequestrar actas u objects.

Art. 19e (nov)

Limitaziun da l'admissiun da medias e medis

¹ La Regenza è cumpetenta per limitar il dumber da medias e medis tenor l'artitgel 55a LAMal²⁾ e tenor l'Ordinaziun davart la determinaziun dals dumbers maximalis da medis en il sectur ambulanz³⁾.

² La Regenza po:

- a) fixar dumbers maximalis per l'admissiun da medias e medis en secturs medicinalis spezialis che na tutgan betg tar il provediment da basa;
- b) sistir la concessiun d'admissiuns da medias e medis tenor l'artitgel 55a alinea 6 LAMal en secturs medicinalis spezialis che han in augment dals custs surproporzional.

²⁾ CS [832.10](#)

³⁾ CS [832.107](#)

Art. 19f (nov)

Fixar ils dumbers maximalis da medias e medis

¹ Cun fixar ils dumbers maximalis da medias e medis resguarda la Regenza la cuntanschibladad dals furniturs da prestaziuns e la garanzia d'in provediment decentral da la sanadad.

² Ella fixescha ils dumbers maximalis da medias e medis per regiun respectivamain per subregiun da provediment da la sanadad u cuminaivlamain per pliras regiuns da provediment da la sanadad vischinas.

³ En enclegientscha cun ils chantuns pertutgads po ella fixar ils dumbers maximalis da medias e medis sin plaun interchantunal.

⁴ Ella fixescha il factur da valitaziun che sto vegnir resguardà – tenor l'artitgel 5 alinea 2 da l'Ordinaziun davart la determinaziun dals dumbers maximalis da medis en il sectur ambulanz³⁾ – tar la fixaziun dals dumbers maximalis per mintga sectur medicinal spezial e per mintga regiun da provediment da la sanadad.

II.

Naginas midadas en auters relaschs.

III.

Naginas aboliziuns d'auters relaschs.

IV.

Questa revisiun parziala è suttamessa al referendum facultativ.

La Regenza fixescha il termin da l'entrada en vigur.

³⁾ CS [832.107](#)